

誥封一品夫人陳母劉太夫人像讚

陳母劉太夫人者湘陰贈公時彥之妻總兵斌生之母也太夫人嬪于陳生總兵兄弟四家無儲糧惴惴不相保晝紡夜績恃女紅佐炊歷寒暑靡間或宿春不繼煮瓜芋爲羹哺以代粒夥頤拮据而無憂色口無怨言人將不勝其戚太夫人操作自若也洎總兵稍長往投左文襄營出關西征累功洊保今職迭總師千總兵弟開雲先後從戎授靖州都司家人銖積一秉儉勤自是家漸裕太夫人面無喜色口無矜言操作如平時總兵凍少休太夫人曰吾聞之順逆窮通人之定數也不可以境遇而

變其操禮義廉恥人之常經也不可以境遇而隳所守汝惟不貪乃能保厥操汝惟不怠乃克固厥守又曰孤兒嫠婦天下之窮民也酌吾之盈劑彼之虛因彼之不足盡吾之有餘斯則吾志之所存也吾肆吾勤安用少休爲哉君子謂太夫人慈而有化而優於德性總兵慷慨斥資財倡設保節公廩及孤兒分院承母訓也詩曰溫溫恭人維德之基又曰教誨爾子式穀似之此之謂也贊曰猗與賢母勤儉宜家履豐若素膺福無涯教子知方耄年終膳愷悌其心盎然者面

中壘後人瀏陽劉善澤謹撰